

22 OCT 1998

Mahathir-Ethiopia

MALAYSIA AKAN BANTU ETHIOPIA BERDAMAI, KATA MAHATHIR

KUALA LUMPUR, 22 Okt (Bernama) -- Perdana Menteri Datuk Seri Dr Mahathir Mohamad malam ini berkata Malaysia, dalam semangat kerjasama Selatan-selatan, akan membantu Ethiopia dengan usaha-usaha ke arah perdamaian kebangsaan negara itu.

Malaysia melihat dengan penuh minat dan kagum dengan usaha-usaha Perdana Menteri Ethiopia Meles Zenawi ke arah perdamaian di negara ini dan memuji peranannya dalam mencari penyelesaian kepada permasalahan di selatan Sudan dan di Somalia, kata Dr Mahathir.

"Kita juga tahu dengan kegigihan yang ditunjukkan oleh saudara Ethiopia telah maju membangun setelah dua dekad perang saudara untuk menjadi sebuah negara yang bersatu seperti yang ada sekarang," katanya pada jamuan malam rasmi untuk meraikan Zenawi di Sri Perdana di sini.

Zenawi tiba di sini semalam untuk lawatan lima hari di atas jemputan Dr Mahathir.

Beliau diiringi Menteri Perdagangan dan Industri Kasahaun Ayele, pegawai-pegawai kanan kerajaan dan 43 ahli perniagaan.

Malaysia juga kagum dengan usaha-usaha Ethiopia untuk membina semula negara itu, kata Dr Mahathir.

Walaupun kedua-dua negara mempunyai perhubungan yang agak sedikit, terutama sepanjang tiga dekad yang lalu, Malaysia dan Ethiopia mempunyai banyak persamaan, katanya.

"Kedua-dua negara mempunyai kebudayaan yang pelbagai dan kita percaya dalam perkongsian kuasa seperti yang digambarkan dalam semangat persetujuan yang diamalkan oleh kerajaan kita," katanya.

Dr Mahathir berkata kejayaan kedua-dua negara bergantung kepada keupayaan mereka untuk menggalakkan kerjasama positif dan kewujudan bersama di antara rakyat dan berusaha mengurangkan jurang perbezaan di antara pelbagai segmen masyarakat.

"Kunci kepada pengagihan pendapatan yang adil adalah untuk memastikan setiap orang mendapat hak yang saksama," katanya.

Malaysia juga bersedia untuk berkongsi pengalamannya dalam pembangunan dan pengurusan dalam sektor pertanian, telekomunikasi dan hidrokarbon Ethiopia, katanya.

Zenawi dalam ucapannya berkata lawatannya telah membuka peluang yang luas bagi negaranya untuk bekerjasama dengan Malaysia.

Ia juga tepat pada masanya ketika Ethiopia sedang dalam proses membangunkan ekonominya, kata Zenawi.

Masih banyak bidang perniagaan yang boleh diterokai di antara kedua-dua negara, katanya.

-- BERNAMA

HJ AKD